

2006

An dr Fasnacht trifft me d'hofa-häxä  
mr sin einmolig und sicher nit z'verwächsle  
triffsch is a denn hämmer zämme s'fescht  
denn unseri Hofa isch immer no die Bescht

In Ettigä hän sie letscht Joohr sisch nid zum lache  
gmeint sie sötte d Strooss vo unde ufe breiter mache  
eigentlich cha me die Idee nur lobe  
nur jetzt sind die Cheibe no schnäller z Hofstette obä

vo Flüh uff Hofstette chame jetzt ohni Gfohr laufe  
do derfür hämmer e Trottoire miesse kaufe  
e tolli Sach dien mir Häxä do meinä  
eso kömme mr nachem Maskeball in Flüh nid schnäller aber vielleicht besser Heimä

Für d Kampfhundproblematik do obä hän mr e Lösig  
Mer dängge jo mit und sin nid drösig  
Mir stelle e Gsuech us bekannte Gründ  
Leinezwang und Muulkorb für d Höllehünd

Trulla di Rulla, Trulla di ho, Trulla di Hulla, es isch halt eso  
Dr Pfarrer vo Hofstette brucht mehr Kohle  
und Är weiß au wo go hole  
Ab nägscht Joohr will Er sich's nüm lo näh  
Und au an dr Fasnacht e Narrepredigt gäh  
Trulla di Rulla, Trulla di ho, Trulla di Hulla, es isch halt eso

s kömme Babys uf d Wält sisch grandios  
z Hofstette goht Poscht ab, mr findes das famos  
sone Zuewaggs gits zwar fast überall  
mir froge is nur wieviel sind us em glüiche stall

Mr häns gschafft wär hätt das dänggt  
d WM cha cho d Schwyz schuttet mit...e so e Gschängg  
drfür hän mr d Türkemannschaft integriert, sie sin jetzt au drbii  
Nei, nid als Spieler ufem Feld, sondern als Security

Sit Wuche probiere is d'Lütt z'erreiche  
Per Telefon, Sms es isch zum seiche  
i verstand nid wieso das eifach nid goht  
i ha doch neu vom Coop e Handybrot

do chasch nid abbiege dort dörfsch nid inefahre  
vo dere Site chunnsch au nid dure mit em Charre  
an sälem Ort muesch an dr Ample warte  
zum sich in Hofstette zrächtfindä bruucht me glii e Baustellekarte

Kreisschuel hett e neue Name becho  
statt in KSL duet me jetzt in d'OZL goh  
mr findä das macht nid wirkliigg Sinn  
nur well öppis neus druff stoht.. isch nid öppis schlauers drin..

Bim Färnseh luege isch mer nüm so wohl  
wäge so Sändig wie Black und Blond die sind doch hohl  
E Bangg isch s is gliich dr Wärt denn so oder so  
Toppt sie bi wietem s neue Schwyzer Färnseh Logo

Wird's ganz ruhig im Beize-Egge  
Duggt sich d Nadja und duet sich hinter dr Babs versteppe  
Denn chasch druff go es luege alli ganz brav  
Es chunnt nid dr Santiklaus es isch dr Hofagraf

S wird gschnuuderet und gschnützt me chönnt meine sie hän d Grippe  
Mir nämme Euch mit dem Bangg sicher nid uf d Schippe  
Es git Entwarnig sisch nid was me meint  
Sisich dr Martin an sim Jubiläum uf dr Gmeind

